



Kamis, 7 April 2022
Ogen : Esekiel 34: 11-25



Permakan si Adil



Lit istilah ngatakenca "ate keleng seri tapi ate ngena la seri" enda rusur ipakeken i bas engkelengi anak-anak i tengah jabu, terlebih adina enterem anak-anak bas tengah jabu. Dungna si beluh-beluh muat ukur nande bapana. Situasi enda labo situasi si adil, tapi apai si beluh mujiken nande bapana, apai si mejingkat i lebe-lebe nande bapana ia ndatken kekelengen dingen bagin lebih asangken senina entah pe turangna si deban. Bicara lit gia lit biak anak si bage, beluh min orang tua e erbahan adil man anak-anakna.

Bagi oratenta sendah, permakan biri-biri si adil arus seri pengidahna kempak kerina biri-birina. Subuk biri-biri si mejile mbur, si kertang, si megegeh, si lemah. Kerina nge man kepkepenna. I bas merasa ia kerina man, minem, istirahat si mpesenangken ukurna dingen si mpengasup ia mereken asil bagi si ngena ate permakanna. Bage me pe Tuhan si erdolat e me permakan, dingen kita kalak si tek bana e me biri-birina. Seri pengidah Dibata kerina kalak si erkiniteken man baNa. Kerina meherga i lebe-lebeNa.

I bas oratenta tangkas teridah perbahanen-perbahanen si ibahan permakan si adil e kempak biri-birina: mpepulung si enggo merap, ndarami si la idah, mpepulungsa dingen mabaisa ku deleng-deleng, si luka itambari, iadili sada-sadai, mpeserap si mehuli i bas si jahat nari. Janah nina permakan e, kubahan sada perpadanen si jadi jaminen keselamatenna. Si ibahan permakan enda me jadi usihen i tengah-tengah kegeluhenta alu bage, kerina kalak erngena ate i bas perbahanenta si adil. Tetaplah erlajar arah permakan si adil segelah pemeteha rikut kegeluhenta pe tambah warina tambah ngelakoken keadilan. Dibata Si Mada Kuasa e simpengasup kita guna ndalankenca bas kegeluhen si tep-tep wari.